

KOAI MATE RAVE RA ITO IEHOVA ANOANO ITEIA TUATAU?



JEHOVAH'S WITNESSES

МАРТЫРЕСТВО

JEHOVA

JEHOVAH'S WITNESSES

耶和華見證人

ИДЕТЕЛИ ИЕГОВЫ

TE ITI TANGATA

Apiianga 1-4

Ka kiteaia te Au Kite o Iehova i roto i te 240 enua no roto mai i te au pa enua e te au tu oraanga tukeke. Eaa tei taokotai mai i teia pupu tangata tukeke? Eaa te tu o te Au Kite o Iehova?



TA MATOU ANGAANGA

Apiianga 5-14

Kua kitea meitakiia ta matou angaanga tutuanga. E uipa katoa ana matou i ko i to matou Are Uipaanga Patireia no te aapianga i te Pipiria e te akamorianga. Eaa te tu o te au uipaanga i reira, e koai ma te ka aere mai?



TO MATOU AKAAERENGA

Apiianga 15-28

E akaaerenga akonoanga teia kare e kimi moni ana no te au tangata no te au pa enua mai, te inangaro ra i te tavini i te Atua. Akapeea te reira te akanooia anga, aratakiia anga, e te tutakiia anga? Te rave tikai ra ainei te reira i to Iehova anoano i teia tuatau?



Kare teia poroutia e oko. I orongaia mai ei tuanga no tetai angaanga apii Pipiria i te ao katoa, turuia e te tauturu oronga ua.

Me oronga i te tauturu, aere ki te www.jw.org.

Te au taiku anga Tuatua Tapu no roto mai i te Pipiria i te reo Kuki Airani, urianga 1888. Me kare i akakiteia atu, te ngai i akariiia te NW i muri i tetai taiku anga, te akakite maira e no roto mai i te urianga o teia tuatau o te *New World Translation of the Holy Scriptures*.

Koai ma te Rave ra i to Iehova Anoano i Teia Tuatau?

Who Are Doing Jehovah's Will Today?

Nenei Anga o Titema 2016

Rarotongan (JL-RA)

© 2012, 2014 WATCH TOWER BIBLE AND TRACT SOCIETY OF PENNSYLVANIA

Aronga Nenei

Watchtower Bible and Tract Society of New York, Inc.

Walkkill, New York, U.S.A.

Made in Japan

Maaniia i Tiapani

ME TAANGAANGA I TEIA POROUTIA

Akanoo i tetai nga miniti i te au epetoma kia akara meitaki e tai o te au aapianga ka aru mai e kia pau i te au uianga. Mei tei akakite katoaia mai i roto i te au pia e “Kimi Maata Atua,” tauta i te akamatau mai kia matou ei iti tangata no te Atua, apii no runga i ta matou angaanga, e e akara akapeea ta matou akaaerenga i te angaanga anga.





Eaa ra to te Atua Anoano?

Te inangaro ra te Atua kia noo tatou ma te au e te mataora i runga i te enua parataito e tuatau ua atu!

Penei ka manako koe e, ‘Akapeea te reira e tupu ei?’ Kua akakite mai te Pipiria e na te Patireia o te Atua e akatupu i te reira, e ko te anoanoia o te Atua kia kite te au tangata ravarai i taua Patireia ra e tona akakoroanga no tatou.—Salamo 37:11, 29; Isaia 9:6.

Inangaro ra te Atua kia puapingaia tatou.

Mei tetai metua tane meitaki rai te inangaro ra i te mea meitaki no tana au tamariki, te inangaro katoa ra to tatou Metua i te rangi kia mataora tatou e tuatau ua atu. (Isaia 48:17, 18) Kua taputou mai aia e “ko tei akono ra i to te Atua ra anoano, e tika ia i te ora anga e tuatau ua atu.”—1 Ioane 2:17.

Inangaro te Atua kia aaere tatou na tona au arataa.

Te karanga ra te Pipiria e te inangaro ra Tei Anga mai ia tatou i te “apii mai ia tatou i tona au aerenga” kia rauka ia tatou i ‘te aaere na tona ra au arataa.’ (Isaia 2:2, 3) Kua akanoo aia ‘i tetai papaki tangata no tona ingoa’ kia akakite aere i tona anoano i te enua nei.—Angaanga 15:14.

Inangaro ra te Atua kia akamori taokotai tatou iaia.

Kare te reira e akavee nei i te iti tangata, te taokotai nei te akamorianga mou a Iehova ia ratou ma te aroa tika tikai. (Ioane 13:35) Koai ma i teia tuatau te apii ra i te au tane e te au vaine i te au ngai ravarai kia tavini taokotai i te Atua? Te pati atu nei matou ia koe kia kite i te reira na roto i teia poroutia.

KIMI MAATA ATU

Apii i te Pipiria kia matou.

Kua akamata ainei koe i te apii i te Pipiria ki te Au Kite o Iehova? Me kare, ka inangaro ainei koe i tetai apii Pipiria naau uarai, kare e tutaki? Ka kite mai koe e ko te mataara meitakiia kia akavaitata atu koe ki te Atua.

Tiki i te au puka kare e tutaki.

Ka rauka ia koe te aere ki tetai Are Uipaanga Patireia i toou ngai me kore, tuatua atu ki te Au Kite o Iehova e e pati mai i tetai au puka i roto i toou reo te ka tauturu ia koe kia marama i te Pipiria.

Apii no runga ia matou i runga i te Initaneti.

Akara i te *website* akamanaia a te Au Kite o Iehova. Ka rauka ia koe i te tatau i te Pipiria i runga i te Initaneti, e te akara me kore nenei i ta matou au puka i roto i te 750 tuma reo.

www.jw.org





Denmark



Taiwan



Venezuela



Initia

Mei Teaa Rai te tu o te Au Kite o lehova?

Eia aau Kite o lehova i kite mai? Penei ko matou tetai o to kotou au tangata tupu, au oa angaanga me kore au oa apii. Penei i uriuri ana matou i te Pipiria kia koe. Koai ma tikai matou, e eaa ra matou i akakitekite aere ei i ta matou irinaki-anga?

E au tangata noa ua nei matou. No roto mai matou i te au tu oraanga e te au turanga tukeke. No roto ana tetai pae ia matou i tetai akonoanga ke, e kare tetai pae i irinaki ana i te Atua. Inara, i mua ake ka riro mai ei matou ei Au Kite, kua akara meitaki ana matou i te au apiianga a te Pipiria. (Angaanga 17:11) Kua ariki matou i ta matou i kite mai, e kua iki matou i te akamori i te Atua ko lehova.

Puapingaia matou te apii anga i te Pipiria. Kua akakoro-maki matou i te au manamanana e to matou uaorai au tu paruparu, mei ta te katoatoa rai e rave ana. Inara, na te tauta anga i te taangaanga i te au kaveinga Pipiria i te au ra rava-rai, kua meitaki mai to matou tu oraanga. (Salamo 128:1, 2) Ko teia tetai tumu i akakitekite aere ei matou i te au mea meitaki ta matou i apii mai no roto mai i te Pipiria ki tetai ke.

Aru nei matou i te au kaveinga a te Atua. Te tauturu nei teia au kaveinga i roto i te Pipiria ia matou kia rauka mai te tu meitaki, kia akangateitei i tetai ke, e kia akaari i te au tu tika e te tu takinga meitaki. Te tauturu ra teia au tu i te akatupu mai i tetai au mema meitaki e te puapinga i roto i te iti tangata, e te akamaroiroi ra te reira i te tu taokotai e te tu akono tau o te pamiri. Kua irinaki matou e ‘kare te Atua e akono ana i te tu o te tangata,’ e e taokotaianga taeake pae vaerua matou i te ao katoa, kare e akavaavaa tangata ana e kare e piri ana ki te angaanga poritiki. Noatu e au tangata noa ua nei matou, e iti tangata meitaki tikai matou.—Angaanga 4:13; 10:34, 35.

- Eaa tetai au tu o te Au Kite o lehova e aiteite ra ki tetai atu au tangata?
- Eaa te au tu puapinga tei rauka mai i te Au Kite no te apii anga i te Pipiria?

Eaa ra Matou i Kapikiia ai e ko te Au Kite o Iehova?


Maata te au tangata tei manako ana e ko te ingoa o te Au Kite o Iehova e ingoa no tetahi akonoanga ou. Inara, tere atu i te 2,700 mataiti i tope, kua akatakaia mai te au tavini o te Atua mou anake e i “kite” nona. (Isaia 43:10-12) I kapikiia ana matou e Aronga Apii Pipiria i mua ake i te mataiti 1931. Eaa ra matou i rave e i te ingoa o te Au Kite o Iehova?

Te akataka ra te reira i to matou Atua. Kia tau ki te au tataanga taito, kua kitea te ingoa o te Atua, ko Iehova e tauatini au taime i roto i te Pipiria. I roto i te au urianga e manganui kua monoia teia ingoa ki te nga taoonga Atua me kore Atua. Inara, kua akakite te Atua iaia kia Mose na te taiku anga i tona ingoa, ko Iehova, te na ko anga e: “Ko toku ia ingoa e tuatau ua atu.” (Exodo 3:15) Na roto i teia tu, te akatakake ra aia iaia uorai mei te au atua pikikaa ravarai. Te rekareka tikai nei matou i te apai i te ingoa tapu o te Atua.

Te akataka maira te reira i ta matou angaanga. Maata ua atu te au tangata i te tuatau taito, akamata mai mei te tangata tuatua tika ko Abera, tei akakite mai i to ratou irinaki i roto ia Iehova. I te au anere mataiti, kua kapiti atu a Noa, Aberahama, Sara, Mose, Davida, e tetahi aronga ke ki teia ‘urupu maata kite.’ (Ebera 11:4-12:1) Mei tetahi tangata rai ka tu mai e kite i roto i te are akavaanga no te paruru i tetahi tangata kare i rave i te kino, te tauta nei matou i te akakite i te tuatua mou no runga i te Atua.

Te aru nei matou ia Iesu. Kua kapiki te Pipiria iaia e ko “te kite mou e te tuatua-mou.” (Apokalupo 3:14) Kua tuatua a Iesu e ‘kua akakite aia i to te Atua ingoa’ e kua ‘akakite ua rai aia i te tuatua-mou’ no runga i te Atua. (Ioane 17:26; 18:37) No reira, ka apai e ka akakite aere te au pipi mou a Karaiti i to Iehova ingoa. Ko teia ta te Au Kite o Iehova e rave nei.

- Eaa ra te Aronga Apii Pipiria i apai e i te ingoa o te Au Kite o Iehova?
- Eaa te roa te vai anga to Iehova au kite i te enua nei?
- Koai to Iehova Kite maata rava atu?



KIMI MAATA ATU

Me aravei koe i te au mema o to matou putuputuanga, e tauta kia kite meitaki ia ratou. E ui kia ratou e: “Eaa ra koe i roto mai e i Kite no Iehova?”





Aronga Apii Pipiria, au mataiti 1870



Itiu mua o *Te Punanga Tiaki*, 1879



Te Punanga Tiaki i teia tuatau

Akapeea te Tuatua Mou Pipiria i Kitea Akaouia Mai Ei?

Kua totou mai te Pipiria e i muri ake te mate anga o Karaiti, ka na roto mai te au orometua pikikaa i te au Kerititiano mua e ka tau i te tuatua mou Pipiria. (Angaanga 20:29, 30) Kare i roa ana kua tupu mai te reira. Kua tau ratou i te au apiianga a Iesu ki te au manako akonoanga peikani, e kua tupu mai tetai tu Akonoanga Kerititiano pikikaa. (2 Timoteo 4:3, 4) Akapeea i papu ei ia matou i teia tuatau e kua marama meitaki matou eaa *tikai* ta te Pipiria e apii maira?

Kua tae te tuatau no Iehova i te akakite mai i te tuatua

mou. Kua totou mai aia e i 'te tuatau openga, ka tupu maata mai te kite.' (Daniela 12:4) I te mataiti 1870, kua kite mai tetai pupu meangiti e kimi ra i te tuatua mou e e maata te au apii a te eka-retia kare no roto mai i te Tuatua Tapu. No reira, kua kimi ratou i te akamaramaanga a te au apiianga mua o te Pipiria, e kua tau-turu a Iehova ia ratou kia marama i te au tuatua tapu.

Kua apii meitaki te au tangata ngakau tae i te Pipiria. Kua aruaru taua Aronga Apii Pipiria ra, i mua ake ia matou, i te rave i tetai ravenga meitaki no te apii anga, e te taangaanga nei matou i te reira i teia tuatau. Kua uriuri ratou i te au tumu manako takaki tai o te Pipiria. Me kite ratou i tetai irava Pipiria kare ratou e marama ana, kua kimi ratou i tetai au irava ke mai i te akamarama i te reira. Me marama ratou i te reira e te rotai ra te manako ki te katoaanga o te au Tuatua Tapu, kua tata ratou i te reira. Na te tuku anga i te Pipiria kia akamarama mai i te au irava, kua kitea akaouia mai e ratou te tuatua mou no runga i te ingoa o te Atua e tona Patireia, tona akakoroanga no te au tangata e no te enua nei, te turanga o tei mate, e te manakonakoanga no te tuakaouanga. Kua tauturu taua kimikimi anga ra ia ratou kia akaruke i te au apiianga e te au peu pikikaa.—Ioane 8:31, 32.

Tae anga ki te mataiti 1879, kua marama te Aronga Apii Pipiria e kua tae te tuatau i te akakitekite aere i te tuatua mou. No reira i taua mataiti rai, kua akamata ratou i te nenei i te makatini, *Te Punanga Tiaki Akakiteanga* i te Patireia o Iehova, mei ta matou e nenei nei i teia tuatau. Teiane te akakite nei matou i te tuatua mou Pipiria ki te au tangata i roto i te 240 enua e i roto i te 750 tuma reo. Kua totoa maata atu te kite tuatua mou, tei kare rava i tupu ana i mua ana!

- Muri ake te mate anga o Karaiti, eaa tei tupu mai ki te tuatua mou Pipiria?
- Akapeea i kitea akaouia mai ei e matou te tuatua mou mei te Tuatua a te Atua?

Eaa ra Matou i Nenei ei i te *New World Translation*?

No tetai raungauru mataiti, kua taangaanga, nenei, e kua tua aere te Au Kite o Iehova i te au urianga tukeke o te Pipiria. E kua kite mai matou e te anoanoia ra kia neneiia tetai urianga ou te ka tauturu i te au tangata kia rauka te “kite i te tuatua-mou,” e ko to te Atua anoanoia no te katoatoa. (1 Timoteo 2:3, 4) No reira, i te mataiti 1950, kua nenei matou i tetai au tuanga o te Pipiria *New World Translation* i roto i te reo o teia tuatau. Kua uri meitakiia teia Pipiria ma te tika tikai i roto i te 130 tuma reo.

Anoanoia ra tetai Pipiria mama ua i te marama. Te tau nei te au reo i te au taime, e e maata te au urianga kare e maramaia ana. E maata katoa te au tataanga taito tika tei kiteaia mai tei vaitata atu ki te urianga mua, e tei tauturu mai kia marama meitakiia atu te Pipiria reo Epera, reo Arama, e te reo Ereni.


Anoanoia ra tetai urianga te rotai tikai ra ki te tuatua a te Atua. Kare ratou i tau ana i te au tataanga akauruia a te Atua, mari ra kua aru rotai tikai te aronga uri Pipiria i te urianga mua. Ko te maataanga o te au urianga, kare te ingoa o te Atua, ko Iehova i roto i te au Tuatua Tapu.

Anoanoia ra tetai Pipiria te akangateitei ra i Tei Tata mai i te reira. (2 Samuela 23:2) Kua akaokii te ingoa o Iehova ki roto i te *New World Translation* te ka kiteaia mei tetai 7,000 taime i roto i te au tataanga taito o te Pipiria mei tei akaarii mai i raro akenei. (Salamo 83:18) No te au kimi-kimi meitaki anga i te au mataiti, ka mareka tikai koe i te tatau i teia Pipiria no te mea te akaari meitaki maira te reira i to te Atua manako. Mei tei roto te *New World Translation* i toou reo me kare, te akamaroiroi atu nei matou ia koe kia tatau ua rai i te Tuatua a Iehova i te au ra ravarai. —Iosua 1:8; Salamo 1:2, 3.

- Eaa ra matou i manako ei e ka anoanoia tetai urianga ou o te Pipiria?
- Eaa ta tetai tangata ka rave i te au ra ravarai kia kite i to te Atua anoano?



Congo (Kinshasa)



Rwanda

KIMI MAATA ATU

Tatau i te tuatua akamataanga o te *New World Translation*, e kia pau i te uianga e: “Eaa te apainga maata ta te kumiti urianga i rave no te nenei anga i teia Pipiria?” E oti, e akaite atu i ta ratou urianga o te au irava i raro akenei ki tetai au urianga ke o taau Pipiria: Genese 25:29; Isaia 14:23; Mataio 5:3; 11:12; 1 Korinetia 10:24, 25; Filipi 1:8.



Potonga papa tuatua o te Symmachus no te ingoa o te Atua i roto ia Salamo 69:31, no te toru me kore a anere mataiti T.N.





Argentina



Sierra Leone



Belgium

KIMI MAATA ATU

Me ka inangaro koe i te kite ia roto i te Are Uipaanga Patireia i toou ngai i mua ake ka aere ei koe ki ta matou au uipaanga, pati ki tetai o te Au Kite o lehova kia apai ia koe ki reira e kia akaari aere i te reira kia koe.



Eaa Taau ka Kite Mai Mei ta Matou au Uipaanga?

Maata te au tangata kare e aere akaou ana ki te pure no te mea kare ratou e kite ana i tetai aratakianga pae vaerua e te akapumaanaanga. Eaa ra koe ka aere ei ki te au uipaanga Kerititiano tei akanooia e te Au Kite o lehova? Eaa taau ka kite mai i reira?

Ka rekareka koe me kapiti atu ki tetai iti tangata aroa e te pumaana. I te au anere mataiti mua, kua akanooia te au Kerititiano i roto i te au putuputuanga, e kua raveia te au uipaanga ei akamorianga i te Atua, ei apii i te au Tuatua Tapu, e ei akamaroiroi i tetai e tetai. (Ebera 10:24, 25) Te akaputupu anga ratou ki roto i tetai iti tangata aroa, kua kite mai ratou e tei rotopu ratou i te au oa mou—to ratou au taeake e te au tuaine Kerititiano. (2 Tesalonia 1:3; 3 Ioane 14) Te aru nei matou i te reira tu e te kite katoa nei matou i taua tu mataora ra.

Puapinga no te apii anga i te taangaanga i te au kaveinga Pipiria. Mei te tuatau o te Pipiria, kua uipa kapiti te au tane, au vaine, e te au tamariki. E taangaanga ana te au puapii tukatau i te Pipiria i te tauturu ia matou kia kite i te taangaanga i te au kaveinga i roto i to matou oraanga i te au ra ravarai. (Deuteronomi 31:12; Nehemia 8:8) Ka rauka i te katoatoa i te piri mai ki roto i te uriurianga e te au imene, te akatikaanga i te katoatoa kia akaari i te manakonakoanga Kerititiano.—Ebera 10:23.

Akameitakianga no te akaketaketaanga i toou irinaki i te Atua. Kua akakite atu te apotetoro ko Paulo ki tetai o te putuputuanga i tona tuatau e: “E anoano maata toku kia kite atu ia kotou. . . . Kia pumaana oki au e kotou katoa i to tatou akarongo, i to kotou e i toku katoa oki.” (Roma 1:11, 12) I ko i te au uipaanga, e riro ana to matou taokotaianga putupu ki to matou au taeake irinaki i te akaketaketa i to matou akarongo e kia tauta i te aru i te au kaveinga Pipiria.

Eaa ka kore ei e ariki rekareka mai i teia patiangā kia aere mai koe ki ta matou uipaanga a te putuputuanga kia kite koe i teia au mea? Ka ariki pumaanaia atu koe. Kare e tutakia ana te au uipaanga—kare rava e raveia ana te koi moni.

- Te aru ra ta matou uipaanga a te putuputuanga i teea akaraanga?
- Akapeea tatou me puapingaia me aere tatou ki te au uipaanga Kerititiano?



Malaysia

Akapeea Matou te Puapinga Anga Mei te Taokotaianga Kerititiano?


Noatu ka na roto matou i te vaorakau me kore te reva kino, e aere putuputu ana matou ki ta matou au uipaanga Kerititiano. Noatu te au akaoanga o te oraanga e te tu roiroi no te angaanga, eaa ra te Au Kite o Iehova i tauta ei kia piri atu ki to ratou au taeake irinaki?

E mea meitaki te reira no to matou oraanga. ‘Kia akono marie i tetai e tetai,’ i tata ai a Paulo, te tuatua anga no te aronga tei taokotai mai ki te putuputuanga. (Ebera 10:24) Te aiteanga o teia tuatua “kia akamanako meitaki tikai,” koia oki kia kite meitaki i tetai e tetai. No reira te akamaroiroi maira te tuatua a te apotetoro ko Paulo ia matou kia akamanako i tetai ke. Na te kite meitaki anga i tetai atu au pamiri Kerititiano, kua kite mai matou e kua autu meitaki ana ratou i te au akaoanga tei aiteite ki to matou uarai, e ka tauturu te reira ia matou kia puapinga katoaia.

Akaketaketa te reira i te au pirianga oa. E taokotai ana matou i ko i ta matou au uipaanga no te mea e au oa piri vai-tata matou. Tetai au taime e tamataora kapiti ana matou. Eaa ra te puapinga no teia kapitianga? Kua kite mai matou i te akaperepere i tetai e tetai, e kua akaketaketa te reira i to matou pirianga aroa. E me ka na roto to matou au taeake i te au manamanata, ka tauturu matou ia ratou no to matou pirianga ketaketa. (Maseli 17:17) Na te taokotaianga ki te au mema o to matou putuputuanga, te akaari ra matou e te ‘akono ra matou’ i tetai e tetai.—1 Korinetia 12:25, 26.

Te akamaroiroi atu nei matou ia koe kia iki i te aronga e rave ra i to te Atua anoano ei oa noou. Ka kite koe i teia au oa i roto i te Au Kite o Iehova. Auraka e akatika i tetai apinga kia tapu ia koe i te taokotai mai kia matou.

- Eaa ra i puapinga ai no matou kia taokotai i ko i te au uipaanga?
- Aea koe e inangaro ei i te akamatau mai ia koe ki ta matou putuputuanga?



Madagascar



Norway



Lebanona



Itaria



Nu Tirení



Tiapani



Uganda



Lithuania

Mei Teaa Rai te tu o ta Matou au Uipaanga?

E raveia ana te au imene, au pure, tatauanga e te uriurianga i te au Tuatua Tapu i roto i te au uipaanga Kerititiano i mua ana, kare tetai atu au tu peu e o mai ana. (1 Korinetia 14:26) Ka kite katoa koe i te reira i ko i ta matou au uipaanga i teia tuatau.

E raveia ana te au apiianga tau i roto i te Pipiria. I te au openga epetoma, e uipa ana te au putuputuanga i te akarongo ki tetai **akoanga Pipiria** e 30 miniti no runga i ta te au Tuatua Tapu e akakite maira no runga i to tatou oraanga e te tuatau e noo nei tatou. E akamaroiroia ana matou katoatoa kia akara ki roto i ta matou uarai Pipiria. Muri ake i te akoanga, ka raveia te **“Apii Punanga Tiaki”** e tai ora, e e ariiia ana te au mema o te putuputuanga kia piri mai ki te uriurianga o tetai atikara mei te tuanga apii o *Te Punanga Tiaki*. E tauturu mai ana teia uriurianga ia matou kia taangaanga i te au aratakianga a te Pipiria i roto i to matou oraanga. E apiiia ana taua atikara rai i roto i te 110,000 au putuputuanga i te ao katoa.

E tauturuia ana matou kia akameitaki atu i to matou tu karape. E uipa katoa ana matou i tetai aiai i te epetoma no tetai uipaanga e toru tuanga tei kapikiia, **Oraanga Kerititiano e te Angaanga Orometua**, akatumuia ki runga i te apii i roto i ta tatou *Puka Angaanga no te Uipaanga Oraanga Kerititiano e te Angaanga Orometua* i te au marama. Te tuanga mua, Au Mea Umere i Roto i te Pipiria, ei akamatau ia tatou ki te tuanga o te Pipiria, ka anoanoia te putuputuanga kia tatau na mua ake. Aru mai, Rave Maroiroi te Angaanga Orometua, kapiti mai te au akatutuanga akapeea me uriuri i te Pipiria ki tetai ke. Te taeake nana teia tuanga, ka oronga mai aia i tetai au manako ei tauturu ia tatou i te akameitaki atu i to tatou tu karape i te tatau e te tuatua. (1 Timoteo 4:13) Tuanga openga, Oraanga Kerititiano, ka akamanako eaa te mataara tau no te taangaanga i te au kaveinga Pipiria i te au rā. E uriurianga teia, kapiti mai i te uianga e te pauanga te ka akamaata atu i to tatou mārama no runga i te Pipiria.

Me tae mai koe ki ta matou au uipaanga, ka mataora koe i te au tu meitaki o te apiianga Pipiria te ka rauka mai ia koe. —Isaia 54:13.

- Eaa taau ka tapapa atu i te akarongo i te au uipaanga a te Au Kite o Iehova?
- Ko teea uipaanga o te epetoma taau ka inangaro kia tae mai?

KIMI MAATA ATU

Akara meitaki i tetai o te au puka te ka uriuriia i ko i te au uipaanga ka aru mai. E kia akamanako i taau ka kite mai mei te Pipiria te ka puapingaia koe i te au ra ravarai.



Eaa ra Matou ka Akamanea ai no ta Matou au Uipaanga?

Te kite ra ainei koe i te au tutu i roto i teia poroutia i te tu mako o te akamanea anga o te Au Kite o Iehova e aere ra ki te au uipaanga putuputuanga? Eaa ra matou ka akamanako meitaki ei i to matou kakau e te akamanea anga?

Akaari Anga i te akangateitei ki to matou Atua. E tika, kare te Atua e akara mai i to tatou au tu o vao. (1 Samuela 16:7) Inara, me akaputupu matou i te akamori iaia, ka inangaro tikai matou i te akangateitei iaia e to matou au taeake akamori. Me tei mua tatou i te akavaanga, ka akamanea tatou ia tatou no te akaari anga i te tu akangateitei. Pera katoa, me akamanea matou no te au uipaanga te akaari ra matou i te tu akangateitei ki 'te Akava o te ao katoa,' te Atua ko Iehova, e no te ngai e akamori ra matou iaia.—Genese 18:25.

Akaari i to matou au tu meitaki. Te akamaroiroi maira te Pipiria i te au Kerititiano kia akamanea “ma te tu mako e te manako tau.” (1 Timoteo 2:9, 10) Te aiteanga o te akamanea anga “ma te tu mako,” koia oki kia kopae i te au kakau akatietie, tau kore, me kore akaariari kopapa te ka akaraia mai e te tangata. E tauturu katoa mai ana te tu “manako tau” ia matou kia iki i te au kakau meitaki, kare i te kakau mako kore. Te akatika ra teia au kaveinga ia matou kia rave i te au ikianga tau e te tukeke. Ma te kore e tuatua, ka 'manea te tuatua a te Atua o to tatou Ora' e ka riro te reira ei 'akameitaki i te Atua' na roto i to matou tu manea e te meitaki. (Tito 2:10; 1 Petero 2:12) Na te akamanea anga no te au uipaanga, te akakeu ra matou i tetai ke kia akamori ia Iehova.

Noatu kare oou kakau manea tikai, ka akatikaia rai koe kia aere mai ki te Are Uipaanga Patireia. Kare e anoanoia kia aao tatou i te kakau oko maata me kore te au kakau manea tikai, inara kia riro to tatou kakau ei mea tau, ma, e te mako.

- Mei teaa te puapinga o te akamaneaanga me akamori tatou i te Atua?
- Eaa te au kaveinga te arataki ra i ta tatou ikianga no te kakau e te akamaneaanga?



Iceland



Meiko



Guinea-Bissau

Philippines





Cambodia



Ukraine



KIMI MAATA ATU

Na te aru anga i te au manako i runga akenei, e tauta i te akapapa no te Apii *Punanga Tiaki* me kore no te Apii Pipiria a te Putuputuanga. Ma te tauturu a toou puapii Pipiria, e akapapa i tetai pauanga taau ka inangaro i te pau i ko i te uipaanga te ka aru mai.



Akapeea me Akapapa Meitaki no te au Uipaanga?

Me te apii ra koe i te Pipiria ki tetai o te Au Kite o Iehova, penei kua akara ana koe i te ka apiiia i mua ake i te au apii tataki tai. E puapinga maataia ai e mea meitaki kia rave i te reira i mua ake ka aere ei koe ki te uipaanga a te putuputuanga. Ka puapinga maataia tatou me akanoo tatou i tetai papaanga meitaki.

Akamanako i te taime e te ngai ka rave koe i taau apii. Eaa te taime meitaki noou i te akamanako meitaki? I te popongi maiata ainei i mua ake ka aere ei koe ki te angaanga, me kore i te aiaj, e i te tuatau e moe ra te tamariki? Noatu me kare e rauka ia koe i te apii no tetai tuatau roa, e iki eia oou taime ka rauka ia koe i te akapou i te apii, e e tauta kia kore tetai apinga e tamanamanata i te reira. E kimi i tetai ngai muteki ua, e e tamate i te au apinga mei te ratio, tivi, e te terepaoni. Na te pure anga i mua ake i te apii, ka tauturu mai te reira ia koe kia kore e taitaia no runga i te au apinga o taua ra ra, kia rauka ia koe i te akamanako meitaki i te Tuatua a te Atua.—Philipi 4:6, 7.

Akaira i taau e apii ra, e e akapapa kia piri atu. Akamata na te maramaanga i taau ka apii. Akamanako i te tumu tuatua me kore i te pene o te atikara, akara akapeea te au tumu tuatua rikiriki te piri atu anga ki te au tumu tuatua, e e akara meitaki i te au tutu e te au uianga te akakite maira i te au manako puapinga. E oti tatau i te au parakarapa tataki tai, e e kimi i te au pauanga ki te au uianga. Akara e e tatau i te au irava, e e akamanako e akapeea te reira te turuturu anga i taau e apii ra. (Angaanga 17:11) Me rauka ia koe i te pau i te uianga, e akaira i tetai au tuatua puapinga i roto i te parakarapa te ka tauturu ia koe kia akamaara i te pauanga. E oti, e taki koe i toou rima ki runga i ko i te uipaanga me ka inangaro koe i te pau mai i roto i taau uorai au tuatua.

Na te akamanako anga i te au tumu tuatua tukeke te ka uri-urii i ko i te au uipaanga i te au epetoma ravarai, ka rauka ia koe i te kapiti mai i te au manako ou ki taau i kite no runga i te Pipiria.—Mataio 13:51, 52.

- Eaa taau ka akanoo ei akapapaanga naau no te au uipaanga?
- Akapeea koe me akapapa ia koe uorai kia paupau i ko i te uipaanga?

Eaa te Akamorianga a te Ngutuare?

Mei te tuatau taito mai, kua inangaro a lehova i te pamiri tatakai tai kia akapou kapiti i te taime kia akaketaketa i to ratou turanga pae vaerua e to ratou ngutuare tangata. (Deuteronomi 6: 6, 7) Ko te tumu tera i akanoo ei te Au Kite o lehova i tetai taime i te epetoma tatakai tai no te pamiri kia akamori kapiti—no te uriuri manako anga i te au mea pae vaerua i roto i tetai ngai meitaki, kia tau ki ta ratou e anoano ra. Noatu me ko koe anake ua, kia akapou meitaki i te reira taime no te Atua na te rave anga i tetai apii Pipiria te tau ra kia koe.

E taime te reira no te akapiri vaitata anga kia lehova.

“E akavaitata atu ki te Atua, e nana e akavaitata mai kia kotou na.” (Iakobo 4:8) Ka kite meitaki atu tatou ia lehova me apii tatou i te au mea no runga i tona tu e tana au angaanga na roto i tana Tuatua, te Pipiria. Tetai ravenga mama no te akamata anga i te akamorianga a te ngutuare, e akapou i tetai taime kia tatau maata i te Pipiria ei pamiri, e penei kia aru i tei akanooia no te Oraanga Kerititiano e te Angaanga Orometua i te au epetoma. Oronga i tetai tuanga o te tatau anga ki te mema tatakai tai o te pamiri, e kia uriuri te katoatoa i ta ratou i apii ana mei te au Tuatua Tapu.

Ko te taime ia no te akapiri vaitata anga ki te au mema pamiri.

E akaketaketa ana te au tane, au vaine, au metua e te au tamariki i to ratou pirianga ki tetai e tetai me apii kapiti ratou i te Pipiria ei pamiri. Kia riro te reira ei tuatau mataora, au e te puapinga i roto i te epetoma. Tei runga i te mataiti o ta ratou au tamariki, ka iki te au metua i te au tumu manako te ka uriuriia, penei na te taangaanga anga i te au manako i roto i *Te Punanga Tiaki* e te makatini *E Ara!* me kore mei ta matou *website*, *jw.org*. Penei ka tuatua kotou i tetai manamanata ta te tamariki e aro atu ana i te apii e akapeea ratou me autu atu i te reira. Akara i tetai porokaramu i runga i te *JW Broadcasting* (*tv.jw.org*), uriuri i te reira. Penei ka mataora kotou i te apiipii i te au imene te ka imeneia i ko i te au uipaanga, e te kaikai anga i muri ake i te akamorianga a te ngutuare.

Ka riro teia taime puapinga e akapouia ra i te au epetoma tatakai tai no te akamorianga ia lehova ei tauturu i te katoatoa i roto i te pamiri kia mataora i te apii i te Tuatua a te Atua, e ka akameitaki maata mai aia i ta kotou tauta anga.—Salamo 1:1-3.

- Eaa ra tatou ka akanoo ei i tetai taime no te akamorianga a te ngutuare?
- Akapeea te au metua me akatupu i teia atianganga ei mea mataora no te katoatoa i roto i te pamiri?



Korea
Apatonga



Brazil

Autireria



Guinea

KIMI MAATA ATU

Uiui atu e eaa ta tetai ke i roto i te putuputuanga e rave ana no ta ratou akamorianga a te ngutuare. Kimi katoa atu eaa te au puka e vai ra i ko i te Are Uipaanga Patireia ei apiianganga i taau tamariki no runga ia lehova.



Mexico



Tiamani

Eaa ra Tatou ka Aere ei ki te au Akaputupuanga Mamaata?

Eaa ra teia au tangata i mataora maata ai? Te aere ra ratou ki tetai o ta matou au akaputupuanga. Mei te au tavini rai o te Atua i mua ana tei ikuikuia kia uipa kapiti e toru taima i te mataiti, te tapapa atu nei matou kia uipa kapiti atu e tetai pupu tangata maata atu. (Deuteronomi 16:16) I te au mataiti ravarai, e toru a matou angaanga puapinga e rave ana: e rua **akaputupuanga kotinga** e tai ra te roa, e e **uruaanga tapere** e toru ra te roa. Akapeea matou te puapingaia anga mei teia au akaputupuanga?

Akaketaketa ra te reira i to matou taokotaianga taeake

Kerititiano. Mei te ngati Iseraela rai tei mataora ana i te aka-paapaa ia Iehova “i roto i te au uipa anga ra,” te mataora katoa nei matou i te akamori kapiti iaia i ko i te au akaputupuanga puapinga. (Salamo 26:12; 111:1) Te akatupu ra teia au akaputupuanga i tetai atiangā no matou kia aravei e kia taokotai atu ki te au Kite i roto i tetai atu au putupuanga me kore au enua. E mataora ana matou i te kaikai kapiti i te tuaero i te ngai o te akaputupuanga, te piri atu anga ki te au taeake i roto i teia turanga oaoa pae vaerua. (Angaanga 2:42) E kite mai ana matou i te tu aroa i reira te taokotai maira i te “kapiti anga katoa o te au taeake” i roto i teianei ao.—1 Petero 2:17.



Botswana



Nicaragua



Itaria

KIMI MAATA ATU

Me ka inangaro koe i te kite meitaki atu i to matou au taeake tei taokotai-ia, aere mai ki ta matou akaputupuanga ka aru mai. Ka akaari atu toou puapii Pipiria kia koe i te porokaramu tei neneia kia kite koe eaa te au tumu manako te ka uriurii. Tata ki runga i taau karena e aea, e ka rave-ia kiea te akaputupuanga ka aru mai, e kia aere atu ki te reira me ka rauka ia koe.



Tauturu maira te reira ia matou kia tere ki mua i te pae

vaerua. Kua puapinga katoaia te ngati Iseraela no te mea “kua kite ratou i te au tuatua” o te au Tuatua Tapu tei akamaramaia kia ratou. (Nehemia 8:8, 12) Te akaperepere katoa nei matou i te au ikuikuanga a te Pipiria e rauka maira mei ta matou au akaputupuanga. Kua akatumuia te au porokaramu tatakai ki runga i te tumu manako maata o te Tuatua Tapu. Na roto i te au akoanga manea, au tuanga tuatua kapipiti, au akatutu-anga, kua kite mai matou i te rave i to te Atua anoano i roto i to matou oraanga. E akamaroiroia ana matou e te au tupuanga o te aronga tei autu atu i te au akaaoanga ei au Kerititiano i teia tuatau ngata. I ko i te au uruaanga tapere, e akaari mai ana te au kakau nuku i te au tua Pipiria ei mea tika tika e ei apii anga ia matou i te au mea tau. E raveia ana tetai papetitoanga i te au akaputupuanga ravarai no te aronga te inangaro ra i te aka-tapu i to ratou oraanga ki te Atua.

- Eaa ra te au akaputupuanga i riro ei ei au atiangā mataora?
- Akapeea koe e puapingaia ai mei te aere anga ki tetai akaputupuanga?

Akapeea ta Matou Angaanga Tutuanga Patireia te Akanoonia Anga?

Muri ua ake tona mate anga, kua akakite a Iesu e: “E tutu aereia te evangelia o te basileia nei, e kako rava ake te ao katoa nei; ei kite no te pa enua ravarai; ko te openga iora ia i reira ra.” (Mataio 24:14) Inara akapeea teia angaanga tutuanga i te ao nei e akatupuia ai? Na te aru anga i te akaraanga tei akanoonia mai e Iesu i tona tuatau i te enua nei.—Luka 8:1.

Ka tauta matou i te aravei i te au tangata i to ratou kainga. Kua tereni a Iesu i tana au pipi kia tutu aere i te tuatua meitaki mei tera are ki tera are. (Mataio 10:11-13; Angaanga 5:42; 20:20) Kua tukuia te aronga tutu evangeria i te anere mataiti mua ki tetai au ngai tutuanga kia tutu aere. (Mataio 10:5, 6; 2 Korinetia 10:13) Mei te reira katoa i teia tuatau, kua akanoono meitakiia ta matou angaanga tutuanga, e kua orongaia ki te au putuputuanga tataki tai tetai au ngai kia tutu aereia. Kua tauturu teia ia matou kia akatupu i ta Iesu akauenga e kia ‘tuatua aere ki te tangata, e kia akakitekite ua atu.’—Angaanga 10:42.

Ka tauta matou i te itae i te au tangata i te ngai ka kiteaia ratou. Kua akanoo mai a Iesu i te akaraanga kia tutu aere ki te au tangata i te ngai ka kiteaia ratou, mei te pae taatai me kore i ko i te rua vai o te oire. (Mareko 4:1; Ioane 4:5-15) Ka tuatua katoa matou i te Pipiria ki te au tangata i tetai ua atu ngai—i te pae mataara, au ngai pitiniti, au ngai o te paka, me kore i runga i te terepaoni. Ka tutu katoa matou ki to matou tangata tupu, au oa angaanga, au oa apii e te au kopu tangata me tau te atianga. Kua riro teia au tauta anga ravarai ei oronga anga i te atianga ki te au mirioni tangata i te ao katoa kia akarongo mai ki te tuatua meitaki o te “ora”—Salamo 96:2.

Kua kite ainei koe i tetai tangata ka inangaro koe i te akakite atu i te tuatua meitaki o te Patireia o te Atua, e eaa ta te reira ka rave nona a te tuatau ki mua? Eiaa e tapu i teia manakonakoanga kia koe uaorai. Akakitekite vave atu i te reira kia ratou!

- Eaa te “evangelia” me kore tuatua meitaki te ka akakitekitea atu?
- Akapeea te Au Kite o Iehova te aru anga i te akaraanga o Iesu no te tutuanga?



Paniora



Belarus

Hong Kong

Peru



KIMI MAATA ATU

Pati ki toou puupii Pipiria kia akaari mai e akapeea koe me oronga meitaki atu i taau i apii mai i roto i te Pipiria ki toou au oa.





Kanata

Mei tera are
ki tera are

Apii Pipiria



Apii naau uaorai

Eaa Teia Mea e Painia?

Te taiku ra te tuatua “painia” ki te aronga e atoro ra i te au ngai ou e kia akatuera i te mataara no tetai aronga ke kia aru mai. Kua akaaiteia a lesu mei tetai painia rai tei tonioa mai ki te enua nei kia rave i te angaanga orometua akaoraanga e kia oronga i te atianga no te au tangata kia ora. (Mataio 20:28) Te aru ra tana au pipi i teia tuatau iaia na te akapou anga i te tuatau ka rauka ia ratou kia “akariro i to te pa enua katoa ei pipi.” (Mataio 28: 19, 20) Kua rauka i tetai pae i te rave i ta matou e kapiki ana e ko te angaanga painia.

E tangata tutu evangeria tamou te painia. E au papuritia te Au Kite katoatoa o lehova no te tuatua meitaki. Inara, kua akanoonoo tetai pae i to ratou oraanga kia tavini ei **au painia tamou** te akapou anga e 70 ora i te marama tatakai tai i roto i te angaanga tutuanga. E rauka ai i te rave i teia, kua akaiti mai te maata anga i te ora o ta ratou angaanga moni. Kua ikiiia tetai pae kia tavini ei **au painia takake** i te au ngai te anoano maataia ra te aronga akakitekite anga i te Patireia, te akapou anga e 130 ora me kore maata atu no te angaanga orometua i te marama tatakai tai. E mareka ua ana te au painia i te oraanga mama ua, te irinaki anga e ka oronga mai a lehova i te au mea ka tau no ratou no te oraanga. (Mataio 6:31-33; 1 Timoteo 6:6-8) Te aronga kare e rauka ia ratou i te painia tamou, e tavini ana ratou ei **au painia tauturu**, te akamaata atu anga i ta ratou angaanga tutuanga mei te 30 me kore e 50 ora i te marama.

No te aroa i te Atua e te au tangata i akakeuia ai tetai painia.

Te kite ra matou mei ia lesu rai e e maata ua atu te inangaro tikai ra i te kite i te Atua e tona akakoroanga. (Mareko 6:34) E kua rauka mai ia matou te kite te ka tauturu ia ratou i teianei, te oronga anga kia ratou tetai manakonakoanga papu no te tuatau ki mua. Te akakeu ra te aroa no te tangata tupu i tetai painia kia oronga puareinga i tona taime e tona maroiroi kia tauturu i tetai ke kia kite i te tuatua meitaki. (Mataio 22:39; 1 Tesalonia 2:8) Tei tupu mai, kua akaketaketaia tona akarongo, kua akavaitata atu aia ki te Atua e kua maata atu tona mataora.—Angaanga 20:35.

- Akapeea koe me akataka mai i tetai painia?
- Eaa te akakeu ra i tetai pae kia painia tamou?

Eaa te au Apii na te au Painia?

Kua kite meitakiia te Au Kite o Iehova no ta ratou apii anga tei akatumuia ki runga i te Pipiria. E rave ana ratou i te au apii puapinga no te aronga tei rave tamou i te angaanga tutuanga Patireia ei tauturu ia ratou kia ‘rave tamou i ta ratou angaanga orometua.’—2 Timoteo 4:5, NW.

Apii Tavini Anga Painia. Me pou i tetai painia tamou te mataiti mua i roto i tana angaanga tavinianga tamou, ka ikiia aia kia aere ki tetai apii no te ono ra i ko i tetai Are Uipaanga Patireia i te pae ua mai. Te akakoroanga o teia apii, koia oki kia tauturu i te painia kia akavaitata atu kia Iehova, kia tukatau i roto i te au tuanga ravarai o te angaanga orometua, e kia tavini tiratiratu ua atu rai.

Apii no te Aronga Tutu Evangelia. Kua akanooia teia apii e rua marama kia tereni i te au painia tukatau tei inangaro i te akaruke i to ratou kainga me kore ngai kia tavini i te ngai e anoanoia ra ratou. Mei te mea rai e te karanga ra ratou e, “I na, teia au; ko au taau e tono” e te aru ra ratou i te tangata tutu evangelia maata rava atu tei tavini i te enua nei, ko Iesu Karaiti. (Isaia 6:8; Ioane 7:29) Me neke ratou ki tetai ngai mamao, penei ka anoanoia ratou kia akatanotano ki tetai oraanga mama ua. Penei e tuke takiri te au peu, te reva, e te kai ki ta ratou i matau. Penei ka anoano katoaia ratou kia apii i tetai reo ou. Ka tauturu teia apii i te au taeake e te au tuaine kare i akaipoipo, e te au tokorua akaipoipo, mei te 23 ki te 65 mataiti kia akatupu i te au tu vaerua te umuumuia ra i roto i ta ratou tukuanga angaanga e te kite karape kia taangaanga meitakiia ratou e Iehova e tana akaaerenga.

Apii Pipiria Punanga Tiaki o Gileada. Te aiteanga o “Gileada” i te reo Ebera ko te “Tutu Maata Anga.” Mei te akamataanga i te mataiti 1943, kua tereni te Apii Gileada i tetai 8,000 tuma aronga e kua tono ia ratou ei au mitinari kia tutu aere “ki te openga o te enua.” E kua puapinga maataia ta ratou angaanga. (Angaanga 13:47) Te tae anga te au mitinari mua ki Peru, kare e putuputuanga i reira. I teiane ra, tere atu i te 1,000 putuputuanga. Te akamataanga to matou au mitinari i te tavini i Tiapani, e iti mai i te tai ngauru Au Kite i tera enua. I teiane ra, tere atu i te 200,000 Au Kite. E raveia ana te Apii Gileada e rima marama, e te kapiti maira ki te reira te apii oonu anga i te Tuatua a te Atua. Te aronga e tavini nei ei painia takake me kore ei mitinari, te aronga i roto i te au opati manga, me kore i te angaanga kotinga, ka patiiia kia aere mai ki teia apii no te terenianga pakari kia akaketaketa e kia akatinamou i te angaanga tutuanga i te ao katoa.

- Eaa te akakoroanga o te Apii Tavini Anga Painia?
- Noai ma i akanooia ai te Apii a te Aronga Tutu Evangelia?



Marike

Apii Gileada i
Patterson, New York

Panama



Finland



Apii anga

Atoro anga



Tutuanga



KIMI MAATA ATU

Koai ma ka tau kia tavini?
Ka rauka ia koe i te tatau i te
au tu ka tau no te aronga pakari
e te au tavini orometua i roto
i te Tuatua Tapu o
1 Timoteo 3:1-10,
12, e Tito 1:5-9.



Akapeea te Aronga Pakari me Tauturu i te Putuputuanga?

Kare to matou orometua e tutakiia ana i roto i to matou akaaerenga. Mari ra, mei tei raveia ana i te akamataanga o te putuputuanga Kerititiano, kua ikiia te au akaaere ‘ei tiaki i te ekalesia a te Atua.’ (Angaanga 20:28) E aronga pakari teia e pirianga ketaketa to ratou kia Iehova, te rave ra i te aratakianga e te tiaki ra i te putuputuanga, “auraka ra no te akaeue, no te anoano ra; auraka no te apinga tika kore ra kia rauka, no te tae tikai ra o te ngakau.” (1 Petero 5:1-3) Eaa ta ratou angaanga e rave ra?

Te manako maira e te tiaki maira ratou ia matou. Te arataki ra e te tauturu ra te aronga pakari i te putuputuanga kia paruruia i te pae vaerua. Kua kite ratou e kua oronga mai te Atua i teia angaanga puapinga kia ratou, e kare te aronga pakari e akaeue i to te Atua iti tangata, mari ra ka tauturu ratou i te au taeake kia meitaki e kia mataora. (2 Korinetia 1:24) Ka tauta te aronga pakari kia kite meitaki ratou i te au mema tataki tai o te putuputuanga, mei te tiaki mamoe rai te akono meitaki ra i tana mamoe tataki tai.—Maseli 27:23.

Apii maira ratou ia matou kia rave i to te Atua anoano.

I te au epetoma ravarai ka akaaere te aronga pakari i te au uipaanga a te putuputuanga ei akaketaketa i to matou akarongo. (Angaanga 15:32) Te rave katoa ra teia au tangata akarongo mou i te arataki anga i roto i te angaanga tutu evangeria, te angaanga kapiti anga kia matou e te terenianga ia matou i roto i te angaanga orometua.

Te akamaroiroi maira ratou i te au tangata tataki tai.

Kia rauka i te akono i to matou au anoano pae vaerua, ka atoro mai te aronga pakari ia matou i te kainga me kore i ko i te Are Uipaanga Patireia i te tauturu e te akapumaana ia matou mei roto mai i te au Tuatua Tapu.—Iakobo 5:14, 15.

Kapiti mai ki ta ratou au angaanga i roto i te putuputuanga, e angaanga moni katoa ana te maata anga o te aronga pakari e te akono anga i to ratou pamiri. E mea tau kia akangateitei matou i teia au taeake angaanga pakari.—1 Tesalonia 5:12, 13.

- Eaa te angaanga a te aronga pakari o te putuputuanga?
- Na teea au mataara e akaari mai ana te aronga pakari i te inangaro kia matou?

Eaa te Angaanga a te au Tavini Orometua?

Te akataka maira te Pipiria e rua pupu tangata Kerititiano te akono ra i te au angaanga a te putuputuanga—‘au akaaere e te au tavini orometua.’ (Philipi 1:1, NW) E au tangata pakari e te au tavini orometua tetai e tavini ra i roto i te putuputuanga tatakai tai. Eaa te angaanga a te au tavini orometua e rave ra kia puapingaia matou?

Tauturu ra ratou i te pupu aronga pakari. E pirianga keta-keta to te au tavini orometua maroiroi e te tiratiratu kia lehova, tetai ia ratou e au mapu, e tetai e aronga pakarikari. E rave ana ratou i te au angaanga puapinga te tau ra no te putuputuanga e no te Are Uipaanga Patireia. Te akatika ra teia i te aronga pakari kia akamou i te manako ki ta ratou au angaanga apii-anga e te angaanga tiaki.

Rave ra ratou i te au angaanga tau. Kua ikiia tetai au tavini orometua kia ariki mai i te aronga ka aere mai ki te au uipaanga. Kua ikiia tetai pae kia akono i te au apinga akatangī, kia oronga i te au puka, e kia akono i te moni e te pira a te putuputuanga, e te oronga anga i te ngai tutuanga a te au mema o te putuputuanga. Ka tauturu katoa ratou i te akono i te Are Uipaanga Patireia. Penei ka pati te aronga pakari ia ratou kia akanoo i tetai ravenga ei tauturu i te aronga pakarikari. Noatu eaa te apainga ka orongaia ki te au tavini orometua, me rave ratou i teia ma te inangaro puareinga tikai, ka akangateiteia ratou e te katoatoa.—1 Timoteo 3:13.

Akanoo ratou i te akaraanga meitaki ei au Kerititiano.

Kua ikiia te au tavini orometua no to ratou au tu meitaki ei Kerititiano. Me rave ratou i ta ratou au tuanga o te uipaanga, ka akaketaketa mai ratou i to matou akarongo. Me rave ratou i te arataki anga i roto i te angaanga tutuanga, ka akakeu ratou ia matou kia maroiroi. No to ratou inangaro i te angaanga kapiti ki te pupu o te aronga pakari, te akatupu ra ratou i te tu mataora e te tu taokotai. (Ephesia 4:16) Kare e roa, ka tau ratou kia tavini ei aronga pakari.

- Eaa te tu o te au tavini orometua?
- Akapeea te au tavini orometua me tauturu i te putuputuanga kia angaanga meitaki?



Myanmar



Tuanga o te uipaanga



Pupu tutuanga


Akono i te Are Uipaanga Patireia



KIMI MAATA ATU

Te au taime me aere koe ki te Are Uipaanga Patireia, e akamatau atu ki tetai o te aronga pakari me kore tavini orometua e kia kite meitaki atu ia ratou e to ratou pamiri.





Malawi



Pupu tutuanga



Angaanga tutuanga



Uipaanga a te aronga pakari

KIMI MAATA ATU

Tata ki runga i taau karena i te au ra ka atoro akaou mai te akaaere kotinga i taau putuputuanga kia tae atu koe ki tana au akoanga i ko i te Are Uipaanga Patireia. Me ka inangaro koe iaia me kore i tana vaine kia piri mai ki taau apii Pipiria i taua epetoma ra kia akamatau atu koe kia raua, e e akakite atu ki toou puapii.



Akapeea te au Akaaere Kotinga me Tauturu ia Matou?

Kua taiku putuputu mai te au Tuatua Tapu Ereni Kerititiano ia Banaba raua ko te apotetoro ko Paulo. Kua tavini ana teia nga tangata ei nga akaaere tutaka, te atoro anga i te au putuputuanga mua. No teea ra? No to raua inangaro i te kite i te turanga o to raua au taeake pae vaerua. Kua karanga a Paulo e ka inangaro aia i te 'oki ki te au taeake' i te akara e te akapeea maira ratou. Kua inangaro aia i te teretere atu mei tetai au anere kiro mita i te akaketaketa atu ia ratou. (Angaanga 15:36) Ko te inangaro tera o to matou au akaaere tutaka i teia tuatau.

Akamaroiroi mai ratou ia matou. E takapini ana tetai akaaere kotinga i te atoro mei tetai 20 au putuputuanga, te akapou anga e tai epetoma ki te putuputuanga tataki tai e rua taimi i te mataiti. Te puapinga maataia nei matou mei te au akaraanga maroiroi a teia au taeake e ta ratou vaine, me kua akaipoipo ratou. Te tauta ra ratou kia kite meitaki i te au mapu e te aronga pakarikari, e te inangaro ra ratou i te piri mai ki ta matou angaanga tutuanga e te au apii Pipiria. E uipa kapiti ana teia au akaaere ki te aronga pakari, te akaketaketa anga ia matou, e te oronga mai anga i te au tuatua akamaroiroianga i ko i te au uipaanga e te au akaputuputuanga.—Angaanga 15:35.

Akaari ra ratou i te inangaro ki te katoatoa. Te manako tikai maira te au akaaere kotinga i te turanga pae vaerua o te au putuputuanga. Ka aravei ratou i te aronga pakari e te au tavini orometua i te akara e me te tupu meitaki ra te au mea, e kia oronga atu i te tauturu tau no te rave anga i te au apainga. Ka tauturu ratou i te au painia kia puapingaia i roto i ta ratou angaanga orometua, e e mataora ana ratou i te kite i te aronga ou e te akarongo atu no runga i to ratou turanga pae vaerua. Te oronga puareinga maira teia au taeake ia ratou ei 'au oa tauturu no matou.' (2 Korinetia 8:23) Kia aru tatou i to ratou tu akarongo e te tu tiratiratu ki te Atua.—Ebera 13:7.

- Eaa te akakoroanga i atoro ei te au akaaere kotinga i te au putuputuanga?
- Akapeea koe e puapingaia ai mei ta ratou atoro anga?

Akapeea Ana Matou me Tauturu i to Matou au Taeake Tei Taitaia?

Me tupu mai tetai tumatetenga, e angaanga viviki ana te Au Kite o Iehova i te tauturu atu i to ratou au taeake tei kino. Te akaari maira taua au tu ra i to matou inangaro ngakau tae i tetai e tetai. (Ioane 13:34, 35; 1 Ioane 3:17, 18) Eaa te au mataara e tauturu ana matou?

E oronga ana matou i te moni. Te tupu anga tetai onge maata i Iudea, kua tuku atu te au Kerititiano mua i roto ia Anetioka i tetai moni ei tauturu i to ratou au taeake pae vaerua. (Angaanga 11:27-30) E akapera katoa ana matou me akarongo matou e te na roto ra to matou au taeake i te au turanga ngata, ka oronga matou i te au apinga na roto i te putuputuanga no te aronga te anoano maata ra i te tauturu.—2 Korinetia 8:13-15.

E oronga ana matou i te tauturu tau. Ka kimi te aronga pakari i ko i te ngai o te tumatetenga i te au mema tataki tai o te putuputuanga i te akapapu kua kiteaia te au Kite katoatoa e te meitaki ra ratou. Ka akapapa te kumiti tauturu i tetai au kai, vai ma ei inu, kakau, ngai nooanga, e tetai tauturu i te pae rapakau. Maata te Au Kite e kite karape to ratou, e oronga puareinga ana ia ratou te tutaki anga i to ratou uaorai patete no te tauturu atu i te angaanga me kore no te maani akaou anga i te au are e te au Are Uipaanga Patireia i kino. Kua riro te taokotaianga ta matou e mataora nei i roto i te akaaerenga e ta matou i kite mai mei te angaanga kapiti anga, ei tauturu ia matou kia akaputu viviki i te au apinga ka anoanoia no taua tuatau ra. Noatu e ka tauturu atu matou i te ‘aronga tikai tei piri mai kia matou i roto i te akarongo,’ ka tauturu katoa atu matou i tetai ke me ka rauka, noatu eaa ta ratou akonoanga.—Galatia 6:10, *NW*.

E oronga ana matou i te akapumaana mei te au Tuatua Tapu. E anoano maata ana te aronga tei kino i te akapumaanaanga. I roto i taua tuatau ra, e rauka mai ana to matou maroiroi mei ia Iehova, ‘te Atua o te pumaana.’ (2 Korinetia 1:3, 4) E mataora ana matou i te akakite aere i te au taputou a te Pipiria ki te aronga tei tumatetenga, te akapapu atu anga e kare e roa atu ka takore te Patireia o te Atua i te au tumatetenga ravarai te akaputu ra i te mamae e te kino.—Apokalupo 21:4.

- Eaa ra te Au Kite o Iehova i viviki ei i te tauturu atu i te tuatau tumatetenga?
- Eaa te akapumaanaanga pae vaerua ka rauka ia matou i te oronga atu ki te aronga tei ora mai?



Dominican Republic



Tiapani



Haiti



Koai te Tavini Akono Meitaki e te Pakari?

Mua ua ake tona mate anga, kua tuatua atu a Iesu ki tana au pipi e a—ko Petero, Iakobo, Ioane, e Anederea. Ia Iesu e totou ra i te akairo o tona noo vaitata anga kia ratou, kua ui a Iesu i tetai uianga puapinga e: “Koai te tavini akono meitaki e te pakari, i ta tona pu i akaaere i tona ngutuare, ei tua i te kai na ratou i te ora mou ra?” (Mataio 24:3, 45; Mareko 13:3, 4) Te akapapu ra a Iesu ki tana au pipi e no te mea koia to ratou “pu,” ka iki aia i te aronga te ka oronga ua mai i te au apiianga pae vaerua no tana au pipi i te tuatau openga. Koai ma i reira teia tavini?

E pupu meangiti o te au taeake akatainua o Iesu. Ko taua “tavini” ra te Pupu Akaaere o te Au Kite o Iehova. Te oronga maira teia “tavini” i te au apiianga pae vaerua i te tuatau tau ki te au taeake akamori o Iehova. Te irinaki nei matou ki teia tavini akono meitaki kia oronga ua mai rai i te “tuanga kai i te ora mou ra”—Luka 12:42.


Te akaaere ra teia tavini i te ngutuare o te Atua. (1 Timoteo 3:15) Kua oronga mai a Iesu i tetai apainga maata no te akono anga i te angaanga o te tuanga o ta Iehova akaaerenga i te enua nei—te akono anga i to te reira au apinga puapinga, te akaaere anga i te angaanga tutuanga, e te apiianga ia matou i roto i ta matou au putuputuanga. E kia oronga mai i ta matou e anoano ra e me anoano matou i te reira. Te oronga maira “te tavini akono meitaki e te pakari” i te au apiianga pae vaerua na roto i te au puka e taangaanga ana matou i roto i ta matou angaanga orometua, pera katoa na roto i te au apiianga e orongaia mai ana i ko i ta matou au uipaanga e te au akaputu-putuanga.

Te turuturu *meitaki* ra te tavini i te au tuatua mou Pipiria e te akauenga kia tutu aere i te tuatua meitaki, e e tu *pakari* to ratou i te akono meitaki i te au anoano o Karaiti i te enua nei. (Anga-anga 10:42) Te akameitaki ra a Iehova i ta ratou angaanga na te akamaata anga i te au apiianga pae vaerua.—Isaia 60:22; 65:13.

- Koai ma tei ikiia e Iesu kia angai i tana au pipi i te pae vaerua?
- Na teea au tu i riro ei te tavini ei akono meitaki e te pakari?



Puapingaia nei matou pouroa mei te au apiianga pae vaerua



Akapeea te Pupu Akaaere te Angaanga Anga i Teia Tuatau?

I te anere mataiti mua, kua tavini ana tetai pupu meangiti, ‘te au aposetolo e te au orometua i Ieruselema,’ ei pupu akaaere no te rave anga i te au ikianga pakari no te putuputuanga Kerititiano katoatoa tei akatainuia. (Angaanga 15:2) Kua rauka ia ratou i te akanoo i tetai ikianga okotai, no te mea kua uriuri ratou i ta te au Tuatua Tapu e akakite ra, e te aru anga i te aratakianga a te vaerua o te Atua. (Angaanga 15:25) Te aruia ra taua tu ra i teia tuatau.

Taangaanga nei te Atua ia ratou kia rave i tona anoano.

Te inangaro maata ra te au taeake akatainuia e tavini ra i roto i te Pupu Akaaere i te Tuatua a te Atua, e e maata to ratou tu karape i te akono i te au mea tau e te au mea pae vaerua. E uipa ana ratou i te au epetoma tataki tai i te uriuri i te au mea e anoano ra te au taeake i te ao katoa. Mei te anere mataiti mua rai, e orongaia mai ana te au ikuikuanga no runga i te Pipiria, na roto i te au reta me kore i te au akaaere tutaka e tetai atu au taeake. E akatupu ana teia i te iti tangata o te Atua kia manako e kia angaanga taokotai. (Angaanga 16:4, 5) Na te Pupu Akaaere e akaaere ana i te akapapaanga i te au apiianga pae vaerua, te akamaroiroia i te angaanga tutuanga Patireia, e te arataki anga i te iki anga o te au taeake kia rave i te au angaanga i roto i te putuputuanga.

E aru ana ratou i te arataki anga a te vaerua o te Atua. E akara ana te Pupu Akaaere ki te Tutara Ngateitei ko Iehova, e ki te Upoko o te putuputuanga ko Iesu no tetai aratakianga. (1 Korinetia 11:3; Ephesia 5:23) Kare tona au mema e manako ana ia ratou uaorai ei au arataki no te iti tangata o te Atua. Te piri ra ratou ki te au Kerititiano katoatoa tei akatainuia i te “aru i te Punua-mamoe [ko Iesu] i tona au aerenga ravarai.” (Apokalupo 14:4) Te ariki rekareka nei te Pupu Akaaere i ta matou au pure no runga ia ratou.

- Koai ma te pupu akaaere i te anere mataiti mua?
- Akapeea te Pupu Akaaere o teia tuatau te kimi anga i ta te Atua aratakianga?



Pupu Akaaere
o te anere mataiti mua



Tatauanga i te reta
a te pupu akaaere

KIMI MAATA ATU

Tatau ia Angaanga 15:1-35, e akara e akapeea te pupu akaaere o te anere mataiti mua i te uriurianga e te akatikatikaanga i tetai manamanata ma te tauturu a te au Tuatua Tapu e te vaerua tapu.





Tipatimani Toroa
Tutu, Marike



Tiamani



Kenia



Colombia

Eaa ra a Betela?

I roto i te reo Epera, te aiteanga o Betela koia oki ‘te Are o te Atua.’ (Genese 28:17, 19) Tau ra te reira ingoa no te au are ta te Au Kite o Iehova i akatu takapini i teianei ao, te ngai e aratakiaa ra e e turuturuia ra te angaanga tutuanga. Te tavini ra te Pupu Akaaere i ko i te opati maata o teianei ao i New York State, U.S.A., e ka akatere mai ratou i te angaanga a te au opati manga i te au enua e manganui mei te reira ngai mai. Kua kiteaia mai te aronga e tavini ra i teia au ngai e ko te pamiri Betela. Mei tetai pamiri rai, e noo kapiti ana e e angaanga kapiti ana ratou, e kaikai kapiti ana, e e apii kapiti ana ratou i te Pipiria.—Salamo 133:1.

E ngai puapinga tikai no te au mema pamiri kia oronga puareinga ua ia ratou uaorai. I roto i te au Betela, e akapou ana te au tane e te au vaine Kerititiano i te rave i to te Atua anoano e te rave tamou anga i te au anoano o te Patireia. (Mataio 6:33) Kare ratou e tutakiaa ana, inara e orongaia ana tetai ngai noo-anga e te au kai na ratou, e tetai manga moni ei tutaki i tetai au apinga. E tuanga angaanga ta te katoatoa i Betela, te angaanga i roto i tetai opati, ngai tunu kai, me kore ngai kaikai anga. E angaanga ana tetai pae i te ngai neneianga me kore i te ngai vaii anga puka, tama anga are, pua kakau anga, akono meitaki anga i te are, e tetai atu au angaanga.

E ngai teia e maata te angaanga te turuturu ra i te tutuanga i te Patireia. Te akakoroanga maata o te au Betela ravarai, kia akakitekite i te tuatua mou Pipiria ki te au tangata e manganui. Ko teia poroutia tetai akaraanga. Kua tataia te reira i raro ake i te akaaere anga a te Pupu Akaaere, kua tukuia atu na roto i te komupiuta ki te au pupu uri reo takapini i teianei ao, kua neneia ki runga i te au matini neneianga viviki i ko i te au ngai neneianga o Betela, e kua tukuia atu ki te 110,000 au putu-putuanga. I roto i te au tuanga ravarai o teia angaanga, e turuturu meitaki ana te au pamiri Betela i teia angaanga puapinga rava atu—te tutuanga i te tuatua meitaki.—Mareko 13:10.

- Koai ma te tavini ra i Betela, e akapeea ratou i te akonoia anga?
- Eaa te angaanga rapurapu e turuturuia ra e te au angaanga i ko i te au Betela tataki tai?

Eaa te Raveia ra i ko i te Opati Manga?

E tavini ana te au mema pamiri o Betela i roto i te au tipati-mani tukeke, te akono anga i te angaanga tutuanga i tetai enua me kore i te au enua tukeke. Penei e angaanga ana ratou i roto i te pupu uri reo, nenei anga makatini, vaii anga puka, ngai akaputuanga puka, ngai maani anga o te au rekotianga tua-tua/vitio, me kore te akono anga i tetai atu au mea no taua enua ra.

Na te Kumiti Manga e akaaere ana i te angaanga. Kua oronga te Pupu Akaaere i te akaaere anga i te angaanga o te opati manga tataki tai ki tetai Kumiti Manga e toru me kore ki tetai atu aronga pakari tukatau. Ka akakite ua rai te kumiti ki te Pupu Akaaere i te angaanga e tupu meitaki ra i te enua tataki tai i raro ake i te akaaere anga a taua kumiti ra, e tetai atu au manamanata te ka tupu mai. Ka tauturu taua au ripoti ra i te Pupu Akaaere kia iki e eaa te au tumu manako ka uriuria i roto i te au puka ou, au uipaanga, e te au akaputupuanga. E tono putupuanga ana te au mata o te Pupu Akaaere kia atoro i te au opati manga e kia oronga i te ikuikuanga a te au Kumiti Manga no te akono anga i ta ratou angaanga. (Maseli 11:14) Kua akanoia tetai porokaramu takake e tetai akoanga na te mata o te opati maata, ei akamaroiroianga i te aronga e noo ra i roto i te ngai o te opati manga.

Orongaia ana te turturu ki te au putupuanga o te reira ngai. Na te au taeake tau i roto i te opati manga e akatika mai kia akamataia tetai au putupuanga ou. Na te au taeake katoa e akaaere ana i te angaanga a te au painia, au mitinari, e te au akaaere kotinga te tavini ra i roto i te au ngai o te opati manga. Ka akanoonoo ratou i te au akaputupuanga e te au uruoanga, te akaaere anga i te akatu anga i te au Are Uipaanga Patireia ou, e kia akapapu e kua tukuia atu te au puka ki te au putupuanga kia rava ta ratou au puka. Te tauturu ra te au angaanga pouroa e raveia ra i ko i te opati manga i te akatupu meitaki anga i te angaanga tutuanga.—1 Korinetia 14:33, 40.

- Akapeea te au Kumiti Manga te tauturu anga i te Pupu Akaaere?
- Eaa te au angaanga e raveia ana i ko i te opati manga?



Solomon Islands



Kanata



Aperika Tonga


KIMI MAATA ATU

Ka ariiia te au manuiiri kia atoro mai i tetai o to matou opati manga, mei te Monite ki te Varaire. Te pati atu nei matou ia koe kia rave i te reira. Me atoro mai koe, aao i te kakau mei te mea rai e te aere ra koe ki te uipaanga. Ka akaketaketaia toou akarongo na te atoro mai anga i te ngai tei tapaia e ko Betela.





Tipatimani Tataanga, U.S.A.

Korea
Apatonga

Armenia



Burundi



Sri Lanka

Akapeea ta Matou Puka me Tataia e me Uriia?

E rauka ai ia matou i te akakitekite meitaki aere i te “evangelia” ki te “pa enua katoa, e te au kopu, e te au reo, e te au iti-tangata,” kua nenei matou i te au puka i roto i te 750 tuma reo. (Apokalupo 14:6) Akapeea matou te akatupu anga i teia angaanga ngata? Kua rauka ia matou i te rave i teia ma te tauturu a tetai pupu aronga angaanga tata e te uri reo i te pa enua—e Au Kite pouroa ratou no lehova.

Kua akapapaia te tataanga mua i roto i te reo Papaa. Na te Pupu Akaaere e akaaere ana i te angaanga a te Tipatimani Tataanga i ko i to matou opati maata o teianei ao. Na teia tipatimani e akaaere ana i te au angaanga a te aronga tata te tavini ra i ko i te opati maata e tetai atu au opati manga. No te tukeke o te au pupu tangata tata i rauka ai ia matou i te tata i te au tumu manako te akakeu ra i te au tu tangata, kia reka mai te au tangata o te au pa enua ravarai i ta matou au puka.

Ka tukuia atu te au tataanga ki te aronga uri reo. Muri ake te akatanotanoia anga e te akatikaia anga te au tuatua tei tataia, ka tukuia atu te reira na roto i te komupiuta ki te pupu uri reo takapini i te ao, kia uri, kia akara e kia akatanotano meitaki mai ratou i te au tataanga. Ka iki ratou i te au tuatua tika kia akamarama mai i te aiteanga tikai o te reo Papaa ki roto i to ratou uaorai reo.—Kohēleta 12:10.

Na te au komupiuta e akaviviki ana i te au angaanga. Kare e rauka i tetai komupiuta i te mono i te aronga tata e te aronga uri reo. Inara, ka rauka ta ratou au angaanga i te akavivikiia na te taangaanga anga i te au tikitinari, te au porokaramu e te au mea kimikimianga i runga i te au komupiuta. Kua maani te Au Kite o lehova i tetai Multilanguage Electronic Publishing System (MEPS). Kia rauka ia ratou i te taipu i te au tuatua i roto i te au anere reo, te tuku anga i te au tataanga ki te pae i te au tutu, e te akapapa anga i te au tataanga tei oti no te neneianga.

Eaa ra matou i tauta ai i te rave i teia, noatu e e au tauatini ua rai tangata te tuatua ra i te reo? No te mea ko to lehova ia anoano ‘kia ora te tangata katoatoa, e kia rauka te kite i te tuatua-mou.’—1 Timoteo 2:3, 4.

- Eaa te o maira ki roto i te tataanga i ta matou au puka?
- Eaa ra matou i uri ei i ta matou au puka ki roto i te au reo e manganui?

Akapeea ta Matou Angaanga te Tutakiia Anga?

E nenei e e tua aere ana ta matou akaaerenga e mirioni ua atu au Pipiria e tetai au puka i te au mataiti ravarai ma te kore e tutaki. E akatu e e akono ana matou i tetai au Are Uipaanga Patireia e te au opati manga. E turuturu ana matou i te aronga i Betela e te au mitinari, e e oronga tauturu ana matou i te au tuatau tumatetenga. Penei te manako ra koe e, ‘Akapeea teia au mea ravarai te tutakiia anga?’

Kare matou e rave ana i te tuanga ngauru o te moni, koi moni aere ana, me kore e pati aere ana i te mereki moni. Noatu e aka moni te pou ana i te turuturu i ta matou angaanga evangeria, kare ra matou e patipati moni aere ana. Mei tetai anere tuma mataiti i topa, kua akakite mai te rua o te itiu o te makatini te *Watchtower* e te irinaki nei matou e na lehova e turuturu mai ana ia matou e “kare rava [matou] e patipati aere e kare katoa e pati atu ki te au tangata kia tauturu mai”—e kare rai matou e rave ana i te reira!—Mataio 10:8.

Na te au moni tauturu oronga ua e turuturu mai ana i ta matou angaanga. Maata te au tangata tei ariki mai i ta matou angaanga apii Pipiria e kua oronga mai i tetai moni tauturu. E oronga mataora mai ana te Au Kite i to ratou uaorai taime, ma-roiroi, e te moni tauturu, e tetai atu au apinga no te rave anga i to te Atua anoano i te ao katoa. (1 Paraleipomeno 29:9) I ko i te Are Uipaanga Patireia e ta matou au akaputupuanga e te au uru-oaanga, te vai ra te au pia akaputuanga moni no te aronga te inangaro ra i te oronga mai i tetai moni tauturu. Me kore ka rauka i te tuku i te moni tauturu na roto i ta matou *website* jw.org. Maataanga o te taime, e oronga mai ana te au tangata kare e maata ana te moni, mei te vaine takaua apinga kore rai ta lesu i tuatua meitaki ana no tei tuku i te nga moni meangiti ki roto i te pia moni o te iero. (Luka 21:1-4) No reira ka rauka i tetai tangata i te akapae putuputu “i tetai papaki moni” ei oronga anga mei “tana i akakoro i roto i tona ngakau.”—1 Korinetia 16:2; 2 Korinetia 9:7.

Te irinaki nei matou e ka akakeu ua rai a lehova i te au ngakau o te aronga te inangaro ra i te ‘akangateitei iaia ma ta ratou au apinga’ i te turuturu mai i te angaanga Patireia kia akatupuia tona anoano.—Maseli 3:9.

- Eaa ra ta matou akaaerenga i tuke ei mei tetai atu au akonoanga?
- Akapeea te au moni tauturu oronga ua me taangaangaia?



Nepal



Togo



Peritane



Porivia

Au Are Uipaanga Patireia—Eaa ra e Akapeea te Reira i te Akatuia Anga?

Mei te akaarii maira e te ingoa Are Uipaanga Patireia, te akamou ra te apiianga maata o te Pipiria ki runga i te Patireia o te Atua—te tumu manako maata o ta lesu angaanga orometua.—Luka 8:1.

E au ngai te reira no te akamorianga mou i roto i te oire. E raveia ana te akanoonooanga no te tutuanga i te tuatua meitaki o te Patireia i roto i reira. (Mataio 24:14) Tukeke te mamaata e te maanianga o te au Are Uipaanga Patireia, inara, tau ua tona akamanea anga, e e maata atu i te okotai putuputuanga e uipaanga ana i reira. I te au mataiti i topa akenei, kua akatu matou mei tetai rangauru tauatini Are Uipaanga Patireia ou (mei tetai rima are uipaanga i te ra okotai) no te maata ua atura te au papuritia i roto i ta matou au putuputuanga. Akapeea i rauka ai teia?—Mataio 19:26.

Na te au moni oronga uaia mai tei akanooia no te akatu anga i te Are Uipaanga Patireia. E tukua ana teia au moni tauturu ki te opati manga kia akanooia no te au putuputuanga e anoano ra i tetai Are Uipaanga Patireia kia akatuia me kore kia akamanea akauia.

Na te aronga tauturu kare e tutakii ana mei te au turanga tukeke o te oraanga e akatu ana i te reira. Kua akanoonooia te **Au Pupu Akatu Anga i te Are Uipaanga Patireia** i roto i te au enua. E neke ana te au pupu angaanga tauturu no te akatu anga mei tetai putuputuanga ki tetai i roto i te enua, pera katoa i roto i te au enua mamao, i te tauturu i te au putuputuanga o te reira ngai kia akatu i to ratou au Are Uipaanga Patireia. I roto i tetai atu au enua, kua iikiia te au taeake tei tau kia akaaere i te akatu anga e te akamanea akaou anga o te au Are Uipaanga Patireia i roto i te tapere tei akanooia. Noatu e ka tauturu mai te aronga angaanga karape i roto i te au ngai ravarai e raveia ana te au akatu anga, na te au mema o te putuputuanga o reira e tauturu ana i te rave i te maata anga o te angaanga. Na te vaerua o lehoava e te tauta maroiroi anga a tona iti tangata i rauka ai teia i te rave.—Salamo 127:1; Kolosa 3:23.

- Eaa to matou ngai akamorianga i kapikiia ai e ko te Are Uipaanga Patireia?
- Akapeea i rauka ai i te akatu i te au Are Uipaanga Patireia takapini i te ao katoa?



Naiteria, i mua ana e i muri mai



Taiti



Akapeea Ana Matou me Akono i to Matou Are Uipaanga Patireia?

Tei runga te ingoa tapu o te Atua i te au Are Uipaanga Patireia ravarai o te Au Kite o Iehova. No reira, kua kite matou e ka riro te akono anga i te are uipaanga kia ma, kia manea, e kia meitaki ei akangateiteianga e ei mea puapinga no ta matou akamorianga tapu. Ka rauka i te katoatoa i te piri mai ki te reira.

Tauturu atu i te tama i muri ake i te uipaanga. Muri ake i te au uipaanga ravarai, e mataora ana te au taeake e te au tuaine i te tama e te akono meitaki i te Are Uipaanga Patireia. E tai taime i te epetoma e tama meitakiia ana te reira. Ka akaaere tetai tangata pakari me kore tetai tavini orometua i te angaanga, na te aru anga i tetai papaanga no te au mea ka raveia. Tei runga i te ka anoanoia kia raveia, ka tauturu tetai aronga i te purumu, mopu (*mop*), me kore ka tama i te taua, e te au ngai reporepo, ka akatikatika i te au noo anga, ka orei e ka tavairakau i te ngai o te are meangiti, ka orei i te au maramarama e te au io, ka apai i te tita, me kore ka tama e ka akono meitaki a vao e a vao ake i te aua. E tai taime i te mataiti, ka akanooia tetai ra no te tama anga i te au ngai ravarai. Na te kapiti mai anga i ta matou au tamariki kia rave i tetai au angaanga, te apii ra matou ia ratou kia akangateitei i to matou ngai akamorianga.—Kohéleta 5:1.

Tauturu i te maani akaou i te au mea kua kino. I te au mataiti e akara meitakiia ana a roto e a vao i te Are Uipaanga Patireia. Me ka kitea mai tetai au ngai kino, ka raveia tetai au angaanga i te akono meitaki i te are uipaanga, kia kore e maata te moni e pou ki runga i te reira. (2 Paraleipomeno 24:13; 34:10) Tau meitaki rai tetai Are Uipaanga Patireia ma e te akono meitakiia ei ngai akamorianga i te Atua ko Iehova. Na te piri anga ki teia angaanga, te akaari ra matou e e pirianga vaitata tikai to matou kia Iehova e te akaperepere nei matou i to matou ngai akamorianga. (Salamo 122:1) Ka riro katoa teia i te akamareka i te au tangata i vao mai.—2 Korinetia 6:3.

- Eaa ra matou ka akono meitaki ei i to matou ngai akamorianga?
- Eaa te au akanoonooanga e raveia ana no te akono meitaki anga i te Are Uipaanga Patireia kia ma?



Estonia



Zimbabwe



Mongolia




Puerto Rico



Iseraela

Czech
Republic

Benin

Cayman
Islands

KIMI MAATA ATU

Me ka inangaro koe i te maani i tetai runanga puka naau, akara eaa te au puka e vai ra i te ngai vairanga puka. Kia akakite atu ki toou puapii Pipiria i te au puka taau ka tau i te rave mai na mua.



Akapeea te Runanga Puka o te Are Uipaanga Patireia te Akapuapinga Anga ia Tatou?

Ka inangaro ainei koe i te rave i tetai kimikimianga kia maata mai toou kite i te Pipiria? Te inangaro ra ainei koe i te kite i tetai irava me kore i tetai tangata, ngai, e tetai apinga tei taikua i roto i te Pipiria? Me kore te manako ra ainei koe me ka rauka rai i te Tuatua a te Atua i te tauturu ia koe no runga i tetai mea e manamanata ra koe? Ina, atoro atu i te runanga puka i te Are Uipaanga Patireia.

Oronga maira te reira i te au apinga tauturu no te kimikimianga. Papu e kare koe i tu ake i te au puka a te Au Kite o lehova e vai ra no runga i te Pipiria i roto i toou reo. Inara, tei roto i te runanga puka o te Are Uipaanga Patireia teia au puka ou. Tei roto katoa i te reira te au urianga tukeke o te Pipiria, tetai tikitinari meitaki, e tetai atu au tataanga puapinga ka riro ei tauturu ia koe. Ka rauka ia koe i te taangaanga i te runanga puka i mua ake e i muri ake i te uipaanga. Me kua tamouia tetai komupiuta, peni e *Watchtower Library* tetai i runga i reira. E porokaramu komupiuta teia, tei roto i reira ta matou au puka e tetai au ngai mama ua i te taangaanga ei kimikimi anga, te ka rauka ia koe i te akara i te au tumu manako, tetai tuatua e tetai irava.

Mea meitaki te reira no te aronga i roto i te uipaanga

Oraanga Kerititiano e te Angaanga Orometua. Me o atu koe ki roto i teia apii, peni ka rauka ia koe i te taangaanga meitaki i te runanga puka o te Are Uipaanga Patireia me akapapa koe i taau tuanga apii. Na te akaaere o te Oraanga Kerititiano e te Angaanga Orometua e akono ana i te runanga puka. Kia akapapu aia e tei roto i reira te au puka ou e kua mako te akanooia anga te reira. Ka rauka iaia e toou puapii Pipiria i te akaari atu kia koe e akapeea me kimikimi i te au manako taau e anoano ra. Inara, eiaa e apai i te au puka mei roto mai i te Are Uipaanga Patireia. E ka inangaro tatou kia akono meitakiia te au puka kia kore te reira e reporepo.

Te akamarama maira te Pipiria e e rauka ai “te kite i te Atua,” kia inangaro tikai tatou i te kimi marie i te reira “mei te apinga uunaia ra.” (Maseli 2:1-5) Ka riro te runanga puka o te Are Uipaanga Patireia ei tauturu ia koe kia akamata i taau kimikimi anga.

- Eaa te au apinga tauturu no te kimikimianga e vai ra i roto i te runanga puka o te Are Uipaanga Patireia?
- Koai ma ka rauka i te tauturu ia koe kia taangaanga meitaki i te runanga puka?

Eaa te ka Kitea Mai i Runga i ta Tatou Website?

Kua akakite a Iesu Karaiti ki tana au pipi e: “To kotou mārama, kia kakā iā ki mua i te aroaro o te tangata nei, kia akara ratou i ta kotou angaanga meitaki, e kia akameitaki ratou i to kotou Metua i te ao [rangi] ra.” (Mataio 5:16) Te taangaanga meitaki nei matou i te au apinga tekinoroti ou, e te Initaneti. Tei runga to matou ngai tei akamanaia i te *website* **jw.org**, te reira te au akakitekite anga no runga i ta matou au irinakianga e te au angaanga a te Au Kite o lehova. Eaa ta te reira e akaari maira?

Au pauanga Pipiria no runga i te au uianga e ui putuputuia ana. Ka kite mai koe i te au pauanga o tetai au uianga puapinga tikai e ui ana te au tangata. Ei akaraanga, te nga aenga pepa *Ka Ope Ainei te au tu Mamae?*, *Ka Ora Tikai Ainei Tei Mate?* ka rauka i roto i te 600 tuma reo. Ka kite katoa koe i te *New World Translation* i roto i te 130 tuma reo tukeke e tetai au puka tau-turu i te apii i te Pipiria, kapiti mai i te puka *Eaa Tikai ta te Pipiria e Apii Maira?* e te au itiu ou o *Te Punanga Tiaki* e te makatini *E Ara!* Ka rauka i te tataui i teia au puka e te makatini me kore i te akarongo ki te reira i runga i te initaneti me kore kia kopi i te reira ki runga i te vitio, MP3, PDF, me kore EPUB. Ka rauka ia koe i te kopi mai i tetai au kapi e kia tua atu ki te aronga ka inangaro mai i roto i to ratou reo! Ka rauka te au puka vitio i roto i te au reo akairo e manganui. Ka rauka ia koe i te kopi mai i te au tataui anga nuku Pipiria, te au nuku Pipiria, e te au imene manea ei akarongorongo anga naau me akangaroi koe.

Au akakitekiteanga tika no runga i te Au Kite o lehova. Tei roto katoa i reira te au nuti ou e te au vitio no runga i ta matou au angaanga i te ao katoa nei, te au mea e tupu ra ki te Au Kite o lehova, e ta matou tauturu anga i te au tangata. Ka kite koe i te au akakitekiteanga no runga i te au uruoanga ka tupu mai e te au ngai no te ringi atu anga i to matou au opati manga.

Na roto i teia au mataara, te kaka nei te marama o te tuatua mou ki roto i te au tuanga mamao tikai o te enua. Te puapinga-ia ra te au tangata i te au enua ravarai, pera katoa i Antarctica. Te pure nei matou e kia akatotoa vivikiia ‘te tuatua a te Atua’ na roto i te au enua ravarai, ei akakaka anga i te Atua.—2 Tesalonia 3:1.


- Akapeea te **jw.org** i te tauturu atu anga i te au tangata kia apii i te tuatua mou Pipiria?
- Eaa taau ka inangaro i te akara i runga i ta matou *website*?



Varani



Poland



Rutia

EI AKAMATAKITE ANGA:

Kua maaniia tetai au ngai i runga i te Initaneti e tetai aronga patoi ei akatotoa i te au manako pikikaa no runga i ta matou akaaerenga. Te akakoroanga, kia akaariu ke i te au tangata kia kore e tavini ia lehova. E kopae tatou i taua ngai ra.—Salamo 1:1; 26:4; Roma 16:17.

Ka Rave Ainei Koe i to Iehova Anoano?

Meitaki maata no taau akapou anga i tetai taime i te akara meitaki anga i teia poroutia kia kite meitaki koe i te Au Kite o Iehova, ta matou au angaanga, e te au angaanga a te aka-aerenga. Te irinaki nei matou e kua riro teia ei tauturu ia koe kia kite mai e ko matou te rave nei i to Iehova anoano i teia tuatau. Te akamaroiroi atu nei matou ia koe kia apii i te kite tikai i te Atua, kia akakite atu ki toou pamiri e te au oa i taau i kite mai, e kia piri putuputu mai kia matou i ko i te au uipa-anga Kerititiano.—Ebera 10:23-25.

Ka kite mai koe e me apii maata koe no runga ia Iehova, e maata atu taau ka kite mai i tona inangaro maata ia koe. Ka akakeu te reira ia koe kia rave i taau ka rauka i te akaari i toou inangaro kiaia. (1 Ioane 4:8-10, 19) Inara, akapeea koe me akaari i toou inangaro no te Atua i roto i toou oraanga? Eaa ra te aru anga i tana au turanga akono tau i riro ei ei mea meitaki tikai noou? E eaa te ka tauturu ia koe kia inangaro i te piri mai kia matou i te rave i to te Atua anoano? Ka rekareka toou puapii Pipiria i te tauturu ia koe i te kimi i te au pau-anga kia rauka ia koe e toou pamiri i te ‘tamou tikai i to kotou uaorai inangaro i te Atua, e tae ua atu ki te ora mutu kore ra.’ —Iuda 21.

Te pati pumaana atu nei matou ia koe kia tere ua rai ki mua i roto i te tuatua mou na te apiiangā i teia puka ka aru mai . . .



KIA NOO TAMOU
KOTOU I ROTO I TE
AROA O TE ATUA

